

近代詩鈔

十二

近代詩鈔

沈曾植



曾植字子培號乙盦浙江嘉興人光緒庚辰進士官安徽布政使

石遺室詩話余與乙盦相見甚晚戊戌五月乙盦以部郎丁母憂廣雅督部招至武昌余先主督部所同住紡紗官局西院多相聚夜談往往三四鼓始睡索君舊作則棄斥不存片楮乙盦博極羣書熟於北魏遼金元史學輿地與順德李若農侍郎文田桐廬袁爽秋太常昶論學最相契詞章之學若不屑措意者余嘗語乙盦君航史學吾亦喜考據其實皆爲人作計無與已事詩雖小道然却是自己性情語言且時時足以發明哲理及

此暇日盍姑事此君意不能無動因言吾詩學深而詩功淺夙喜張文昌樂府山谷精華錄而不輕詆前後七子詩學深者謂閱詩多詩功淺者謂作詩少也余謂君愛艱深薄平易則山谷不如梅宛陵君乃借余宛陵集亟讀之余並舉殘本爲贈其明年君居水陸街姚氏園入秋病瘡逾月不出戶乃時託吟詠余寓廬相密邇日夕過君有所作輒相夸示或夜半函箋抵余至冬已衰然積稿百餘首又明年庚子之亂南北分飛此事遂廢矣乙盦精熟佛典自喜其病僧行一首論詩宗旨略見寒雨積悶雜書遣懷一首余言詩學莫盛於三元謂開元元和元祐君謂三元皆外國探險家覓新世界開埠頭本領故君詩有開天啟疆域元和判州部及敦興元

祐賢奪嫡西江祖各云云余言今人強分唐詩宋詩宋
人皆推本唐人詩法力破餘地耳君甚謂然故又有唐
餘逮宋興師說一香炷及強欲判唐宋堅城捍樓櫓咄
嗟盛中晚幟自閩嚴樹各云云

丹徒渡江

海門日上曉霞開沙路盤紆首重回形勝豈因兵技改江山曾
識霸圖來懸儀坤軸心全動燭渚鮫人淚亦灰堅固焦巖留片
石瓜廬終與老山隈

寶塔灣

蕭晨煙未泮散舸趁輕鳧一往聞揚語重來識佛圖風微漁唱
遠月淡曉光無行色兼悲喜沙頭問僕夫

贈周彥昇

昔聞周北張南雅今共吳味楚尾來名字黯然成舊故江山隨
分借嘲詼清秋高館霜華入白日黃河鬢影催肯放旅懷同寂
寞不妨散策小徘徊

舟發廣陵

歸程指烟水心與楚雲馳客久諳船理江清見鬢絲老慳筋力
用壯惜太平時鼓角中宵動江湖歲晚悲

雜題

榆葉乾青柳葉黃淡雲斜日蜀東岡秋心總在無人處坐看鳬
翁沒野塘

鹿車鴉軋上堤頭南去眞州北楚州不是田間無下澤冷然誰
遣馭風遊

江湖祇是愛平流帆自從容櫓自柔至竟海門原咫尺浪花何

事白人頭

沙禽相伴過中泠塔鐸相聞替戾聲我愧布施無半果也隨宏
願喜圓成

江洲草長蘆荻肥江上女兒黃葛衣淮東秋冷淞西暖野鴨作
羣南向飛

獨坐鍾山喚寶公南行襟袖挾天風蒼崖白浪今猶昔八百年
來見此翁

燕湖有懷漸西

爲政風流地臨江眺望來極知文雅勝翻惜簡書催長策紆盤
錯蒼髯逸笑談朱雲終就召料理此樗材

小孤山

潯陽九派淪無蹟介石猶然立江磧峨峨高髻古嚴妝俗眼還

疑肖形拙大孤眇然湖中央小姑無端對澎浪楚人禰鬼瀆男
女楚客吟弄傳荒唐鄭亭之神風不颺江湖小龍閤威祥鐵輪
一轉世界換叢靈社鬼吁其亡匡廬南望山蒼蒼大湖雷蠡非
余詳經師閒詁有違異估客指向增睚眦碧瞳老胡手幾尺室
有圖書諳地防嗟余四食武昌魚瞠目山川覆未識山神識我
故相迎峰不知名分外青風雨重陽占未改登高且上桅樓行
重陽風雨抵武昌

颯然風雨洒征衣西望江樓趁鶴飛攬拾落英隨楚俗嬉除行
李避周譏田園計左垂垂老舟楫身從泛泛歸長路定知何日
盡徂年眞信昔人非

曉禽

朝氣動衆禽檐端語喈喈我心感明發起坐與之偕萬籟戰清

秋意車軼埏垓吁嗟敝老人蹙蹙行何階徙倚就南榮陳編強
差排古人終已矣來世誠難裁喉舌詎有殊欣憎邈相乖近前
姑婉變視遠皆奇佻故紙諒難綜故言復何諧冥冥獨歸臥颯
颯嚴霜來

日入

日入燭代明軒窗吠琉璃交光羅幻影鏡鏡無成虧背舍有閤
虛衆芳歛暝姿微風定香過未見心先知視聽各有程晦明亦
有宜喟然念蘧生過闕停車時負杖立廣階西南望參旗出門
視路人各有幽求思摸象盲女愁煎膏智者悲清鐘鏗寺遠悟
了終何之

雨夜

短檠三尺光寫此寒人影浪浪簷雨聲衆響入孤警宵氣憺回

適羈魂逝超騁雲車與風馬見我城南景蟠藤翠髻矯樓檜亞
枝整遊子去不還陰蟲露階哽去國歲再寒清光洗眊眊寸心
局萬念瞥眼造陳境擊柝在遙衢秋城四邊靜推枕起旁皇聽
鷄夜方永

城隅舍幽幽蕙楊與蓀壁鮮民過去身疇昔經行跡寸草不榮
春枯荻不承日病爲無告兒居是無依室殘夢不可思餘生幾
年畢

送陳廉舫

昔共緇塵作漫郎十年凋鬢各蒼蒼周人貴老迎扁鵲鄭圃聞
歌識季梁舊雨客中詒善藥征衣明日隔殊方
露那不吳帆去共張

楚澤

楚澤昔賢蕉萃地日華川上竊停來病身更覺天宇窄老眼不
爲蒲柳哀蕩蕩江湖千念盡堂堂人物百年摧蔣山青骨懸知
記洄水瓊瑰有夢迴

趙森甫先德書冊

放士江鄉傳筆訣故家手澤綴叢編畫中意蘊無駮駸想見潭
思穿被年

包張傳法太平時晚見吳生最老師心畫總隨人代變江山空
寄舊閒思

梅道人墨竹

竹君風味出孤直檀欒晚節無矜持吳生盪胸渭川隘撲筆萬
梢生墨池舊聞江南鐵鉤鎖縣挽乃自顏張遺此竹千丈扶寸
耳折釵拆壁鋒端追至元文采襲延祐水晶宮有南宗師倪黃

吳家蟲蝕木密卯豈獨王蒙持神都昔覲夏山圖筆與元氣相
淋漓却迴鵬遊入蜩掇瘦莖滴露風參差墨玉蛻神五百年題
字澹與秋雲澌畫人去來擬丁个骨董頗得摩絹絲付與支郎
賞神駿驪黃牝牡坐忘時

石遺過談去後簡之

秋晚閒房窈糾思黃車五百夢占辭化神那必無天姊搏控由
來授幻師辛淡甘鹹都自可壙垆莽眇往何之看君布衲吹毛
起萬朶黃華入照時

奉呈石遺

孤雲與寒石郢路偶相將老斲知輪苦新礪得刃藏芥根松葉
味寒月大隄旁畫出陳居士披披布衲涼

答石遺

陵陽寫本費擘摩老屋橫街凍夜過卅載故心如夢見瓣香何
敢廢涪幡

懷抱東華惜壯年鵠鳴寥廓老悽然聞思只住安般地衣鉢諸
師莫浪傳

才語那教酬僉父小文聊可定丁生楚天萬里秋無際且著高
臺放眼明

漫守張爲主客圖旁行斜上破工夫白家廣大元無教得似韓
門變態無

失題

洗樹疏花盥晚香婆婆庭院已斜陽客來策事都無對病後觀
心亦自忘夕望片煙生野寺暝拋經卷偃胡床年來總覺情無
盡歸路那堪日轉長

失題

蠓屈誠何賴鵬口自不堪曉庭苔沁入晚牖日光含故紙身俱
積陳人塊獨甘題襟虛勝想搖落向江潭

練魄

練魄苦不早悲懽同世情華髮垂素纓老逐行人行秋笛無緩
聲秋螢有哀鳴高桐百尺瘦霜月孤輪明黔羸居北陰命駕余
遐征

月夕寄五弟

清風北陸來吹我梧上月石臺倚倒影零露在衣髮萬里羈旅
遊三秋沈寥節黃華屈宋艷伴我張寒色流光若逝水利利不
容揭娛玩此須臾行人想天末

初十夜月

微月出復沒暗蟲終夕鳴夜光收露靜深樹閃星明怪石盤陀
供商歌曳縱行赤藤吾至友危處不相傾

病僧行

病僧病臘不記年臆對或自風壇前蒙戎敗葉擁床敷支離癰
木撐風煙六師派別謬占度休糧恐是金頭仙毗藪紐天攝不
得首羅三目眙相看洗心竭來歸佛祖縛律非律禪非禪含生
大期百二十四百四病根荑全水氣爲瘡木氣瘡娥綠斧性裘
媒寒膏梁奧博物有致此理未可通窮療華子中年病忘久明
心晦惑來無緣假從毗耶示化儀不爾五行同人天婆娑世界
一音隔安有萬二千衆天龍八部相周旋檀闕失莊嚴忍虧無
強堅貪欲羸老基噴悲痰災牽得非夙因招現果突吉羅業雖
有懺悔猶沈綿給孤獨園崢嶸山雁王鹿女遊其間小花正如

普陀白高窟或是毗沙刊臘休雪嶺夏熱泉一瓶一鉢疲往還
或有造其關草枯木石頑九十六道諍研研六十四書文複繁
莊嚴刼過星劫未來恆沙譬喻不可罄像法五百盡末法三千
延病僧病久心茫然蘇迷廬山芥子小石女行歌木兒笑嵐風
撼松藤裊裊幻師善幻五色宣畫師作畫一筆圓瘦骨秋巒屹
條條野鵲巢其顛後來合有棱伽傳

以繆篆分韻贈社耆

平生政爾無長物篆刻何曾累壯夫乞與君家助悠繆從心白
白與朱朱

詣太夷新居不遇歸後簡之

鄂州城南沆沕多具足荇藻葭蒲荷秋霜不嚴蘊潦縮鬱綠敗
紫盈池陂隔衢湫隘萬市屋行相其背翻委佗長烟宛宛西郭

突拭眼政訝雙偷婆鄭侯白鷗狎滄海蟠胸鬱律千蚪鼃卜居
面此一尺水汪汪千頃無由波朝來影瞥踏浪去高樓濯足吞
江沱峨舸大艫足快眼惜哉噫氣無由呵天西新月玉鈎招朔
風嘔啞鳴鴛鴦扶輿相從約苦早買酒欲醉顏非酤人生實難
笑口稀凍野正可供婆娑新篇不抒會面左大冬如此松梅何
蠟花坼香頗蘊藉蜀茶鬥色矜妍娥冥濛霜淞稍濡瓦窈窕陽
燄仍浮河文辭自從兒女戲悲壯或動秋城歌作牋不聊矢詩
寫報章瘦墨晞嵯峨

以御案雲葉瓶贈夕公媵以詩

萬物掉天運頡頏無定姿御案二百年薪火靡停施燕市忽騰
踊貴人競盱眙軒然駕珠玉頓爾凌官柴研研康雍辨譎譎款
模稽器或壘茅差估猶百千隨姦民內府盜夷市囊橐資海上

萬金瓶桓東厲魂啼物妖志五行茲沴誰當推吾儕偶染指所得良殘畸式莫審年郎青况論蘇回去國兩飄蕭閔生一蹉咨龍焙元豐春鼓棹天寶思彼物瑣且頤託貴承平遺哀我萋楚民賤不五穀皮

長至節前三日

阿連別我秋風時南天雨雪今潛潛衡陽雁徂書不俱延頸迴望心煩逐念子行遊日安向醉歌誰與傾尊疊室幽體倦語誰屬塵籛幾疊曾舒排長安卜居待金布維摩方丈非輕諧城西泉甘市南鬧潭潭夏屋空盱眙朋肯臘鼓粥後撾影瞥心似凌謬臺此時獨行或念我園花正對滇茶開豈知我今抱寒石清愁不斷連環揩丈夫失身墜官路千年調遠小鬼哈鑄金不成學道左嗷嗷鵝雁紛堂階霜華攬鏡可憐白炯如孤月天之涯